

BOSNA I HERCEGOVINA
FEDERACIJA BOSNE I
HERCEGOVINE
UNSKO – SANSKI KANTON
Ministarstvo poljoprivrede,
vodoprivrede i šumarstva



BOSNIA AND HERZEGOVINA
FEDERATION OF BOSNIA AND
HERZEGOVINA
UNA-SANA CANTON
Ministry of Agriculture,
Water Management and Forestry

Broj: 08-34-6511-3 /18.
Datum: 05.09.2018. godine

VLADA UNSKO-SANSKOG KANTONA

PREDMET: Informacija o poduzetim aktivnostima u preuzimanju čuvarske službe iz nadležnosti Kantonalne uprave za šumarstvo u nadležnost ŠPD "Unsko-sanske šume" d.o.o. Bosanska Krupa sa prijedlogom zaključka, dostavlja se

Ministarstvo poljoprivrede, vodoprivrede i šumarstva, u skladu sa svojim nadležnostima nadzora nad primjenom Zakona o šumama ("Službeni glasnik Unsko-sanskog kantona", broj: 22/12, 16/16, 12/17 i 25/17), te obavezama i ovlaštenjima propisanim članom 95. i članom 96. stav (2) Zakona o organizaciji organa uprave u Federaciji Bosne i Hercegovine ("Službene novine Federacije Bosne i Hercegovine", broj: 35/05) u cilju poduzimanja potrebnih mjera za rješavanje, Vladi Unsko-sanskog kantona na razmatranje dostavlja informaciju o poduzetim aktivnostima preuzimanja čuvarske službe iz nadležnosti Kantonalne uprave za šumarstvo u nadležnost ŠPD „Unsko-sanske šume” d.o.o. Bosanska Krupa, koje podrazumijevaju primopredaju čuvarskih reona i preuzimanje uposlenika koji su radili na poslovima neposredne zaštite šuma iz Kantonalne uprave za šumarstvo u ŠPD "Unsko-sanske šume" d.o.o. Bosanska Krupa u skladu sa članom 65. i 91a. Zakona o šumama ("Službeni glasnik Unsko-sanskog kantona", broj: 22/12, 16/16, 12/17 i 25/17).

Odredbama člana 64. stav 1. tačka a) Zakona o šumama ("Službeni glasnik Unsko-sanskog kantona", broj: 22/12) i člana 19. stav 1. tačka a) Zakona o organizaciji i nadležnostima kantonalnih organa uprave i upravnih organizacija ("Službeni glasnik Unsko-sanskog kantona", broj: 9/13), Kantonalna uprava za šumarstvo koja se nalazila u sastavu Ministarstva poljoprivrede, vodoprivrede i šumarstva je u svojoj nadležnosti imala osiguravanje neposredne zaštite državnih i privatnih šuma putem čuvarske službe.

Članom 7. Zakona o izmjenama i dopunama Zakona o šumama ("Službeni glasnik Unsko-sanskog kantona", broj: 16/16), izmijenjen je član 64. stav 1. Zakona o šumama tako što je tačka a) brisana, čime je Kantonalnoj upravi za šumarstvo prestala nadležnost neposredne zaštite državnih i privatnih šuma putem čuvarske službe.

Članom 8. stav 1. i 2. Zakona o izmjenama i dopunama Zakona o šumama ("Službeni glasnik Unsko-sanskog kantona", broj: 16/16), izmijenjena je odredba člana 65. stav 1. Zakona o šumama na način da je sada korisnik šuma (a na području Unsko-sanskog kantona je to ŠPD "Unsko-sanske šume" d.o.o. Bosanska Krupa) dužan obezbijediti neposrednu zaštitu šuma i šumskog zemljišta – čuvanje šuma od šumskih požara i drugih elementarnih nepogoda, biljnih bolesti i štetočina, bespravnog prisvajanja i korištenja, bespravne sječe šuma kao i drugih protivzakonitih radnji, putem čuvarske službe; te odredba člana 65. stav 2. Zakona o šumama na način što se čuvarska služba iz stava 1. ovog člana sada formira unutar šumskoprivrednog društva.

Članom 12. Zakona o izmjenama i dopunama Zakona o šumama ("Službeni glasnik Unsko-sanskog kantona", broj: 16/16), Zakon o šumama je dopunjen odredbom člana 91a. koja u svom stavu 1. propisuje da u roku od šest mjeseci od dana stupanja na snagu ovog Zakona, zaposlenici koji su bili zaposleni u kantonalnoj upravi za šumarstvo na poslovima neposredne zaštite šuma preuzimaju se i raspoređuju od strane šumskoprivrednih društava, bez javnog poziva, a u skladu sa stručnom spremom i radnim iskustvom.

Stav 3. člana 91 a. Zakona o šumama je propisao da odredbe Zakona o organizaciji i nadležnostima kantonalnih organa uprave i upravnih organizacija imaju se uskladiti sa ovim Zakonom u roku od šest mjeseci od dana njegovog stupanja na snagu.

Kako se u navedenom roku nije izvršila implementacija odredbi ovog Zakona, novim Zakonom o izmjeni Zakona o šumama("Službeni glasnik Unsko-sanskog kantona", broj: 12/17) izmijenjen je član 91 a. na način da je produžen rok za usklađivanje na još šest mjeseci.

U skladu sa ovim zakonskim odredbama ovo Ministarstvo je kao provedbene propise donijelo Pravilnik o izmjenama i dopunama Pravilnika o zadacima čuvara šuma, načinu izvršavanja zadataka, obliku i sadržaju legitimacije čuvara šuma i kriterijima za utvrđivanje veličine čuvarskih reona ("Službeni glasnik Unsko-sanskog kantona", broj: 21/17) i Pravilnik o načinu žigosanja, obrojčavanja, premjeravanja, sadržaju i načinu izdavanja otpremnog iskaza za drvo ("Službeni glasnik Unsko-sanskog kantona", broj:20/17).

U međuvremenu na snagu je stupio novi Zakon o državnoj službi u Unsko-sanskom kantonu ("Službeni glasnik Unsko-sanskog kantona", broj: 14/17) koji u svom članu 95. stav (3) propisuje da su rukovodioci organa državne službe dužni u roku od 30 dana od dana donošenja propisa iz stava (2) ovog člana donijeti pravilnike o unutrašnjoj organizaciji usklađene sa odredbama ovog Zakona. Ovi podzakonski propisi su doneseni i objavljeni u "Službenom glasniku Unsko-sanskog kantona broj: 22".

Prije donošenja i stupanja na snagu ovih podzakonskih akata, na snagu je stupio i Zakon o izmjenama i dopunama Zakona o organizaciji i nadležnostima kantonalnih organa uprave i upravnih organizacija ("Službeni glasnik Unsko-sanskog kantona", broj: 16/17) kojim su izmijenjene odredbe člana 5. stav (1) Zakona o organizaciji i nadležnostima kantonalnih organa uprave i upravnih organizacija ("Službeni glasnik Unsko-sanskog kantona", broj: 9/13, 11/14, 8/15) na način da je ista dopunjena tačkom c) kojom je Kantonalna uprava za šumarstva utvrđena kao samostalna kantonalna uprava, a brisana je tačka b) stav (2) člana 5. ovog Zakona, čime je prestala biti uprava u sastavu Ministarstva poljoprivrede, vodoprivrede i šumarstva. Istim

Zakonom član 19. je brisan, a iza člana 17. , dodan je novi član 17a. koji je utvrdio nadležnosti Kantonalne uprave za šumarstvo bez nadležnosti osiguravanja neposredne zaštite državnih i privatnih šuma putem čuvarske službe koja je ranije bila propisana članom 19. tačka a).

Odredba člana 17a. Zakona o organizaciji i nadležnostima kantonalnih organa uprave i upravnih organizacija je organizacijski i statusno potvrdila zakonsko rješenje iz člana 64. stav (1) tačka a) i člana 65. stav (1) Zakona o šumama ("Službeni glasnik Unsko-sanskog kantona", broj: 22/12, 16/16 i 12/17).

Obzirom da je Vlada Unsko-sanskog kantona kroz procedure donošenja upoznata sa navedenim izmjenama Zakona o šumama odnosno sa navedenom problematikom, ova informacija se dalje odnosi na aktivnosti koje su uslijedile nakon stupanja na snagu Zakona o izmjenama i dopunama Zakona o šumama ("Službeni glasnik Unsko-sanskog kantona", broj: 25/17) od dana 23.12.2017. godine.

Ovim Zakonom izmijenjen je član 91a tako što je njegovim stavom (1) propisano da se zaposlenici kantonalne uprave za šumarstvo raspoređeni na poslove neposredne zaštite šuma preuzimaju i raspoređuju od strane korisnika šuma bez javnog poziva, a u skladu sa stručnom spremom i radnim iskustvom najkasnije do 30.06.2018. godine, te mu je dodan stav (3) kojim je predviđeno da će u roku od 90 dana od dana stupanja na snagu ovog Zakona rukovodilac kantonalne uprave za šumarstvo uz saglasnost ministra utvrditi kriterije primjenom kojih će dio zaposlenika iz stava (1) ovog člana, u skladu sa potrebama Kantonalne uprave za šumarstvo zadržati u radnom odnosu u Kantonalnoj upravi za šumarstvo za rad u privatnim šumama. U novom stavu (3) propisano je da će ovo Ministarstvo najkasnije do 30.06.2018. godine izvršiti izmjene provedbenih propisa u skladu sa ovim Zakonom.

Istovremeno je na snagu stupio i Zakon o dopuni Zakona o organizaciji i nadležnostima kantonalnih organa uprave i upravnih organizacija ("Službeni glasnik Unsko-sanskog kantona", broj: 25/17) u kojem je članu 17a. dodan novi stav (2) koji glasi: "Pored nadležnosti iz stave (1) ovog člana, a najduže do 30.06.2018. godine, Kantonalna uprava za šumarstvo osigurava neposrednu zaštitu državnih i privatnih šuma putem čuvarske službe." Ovom dopunom vraćena je nadležnost neposredne zaštite državnih i privatnih šuma putem čuvarske službe Kantonalnoj upravi za šumarstvo.

Izmjene oba zakona su izvršene samo u cilju omogućavanja provođenja primopredaje čuvarskih reona i preuzimanja uposlenika – čuvara šuma iz Kantonalne uprave za šumarstvo u radni odnos u ŠPD "Unsko-sanske šume" d.o.o. Bosanska Krupa u skladu sa Zakonom o šumama obzirom da je istekao zakonski rok koji je, po do tada važećim odredbama Zakona o šumama ("Službeni glasnik Unsko-sanskog kantona", broj: 22/12, 16/16 i 12/17) i Zakona o organizaciji i nadležnostima kantonalnih organa uprave i upravnih organizacija ("Službeni glasnik Unsko-sanskog kantona", broj: 9/13, 11/14, 8/15 i 16/17) propisivao nadležnost neposredne zaštite državnih i privatnih šuma putem čuvarske službe u Kantonalnoj upravi za šumarstvo.

Neposredno prije zadnjih izmjena oba navedena zakona, svim čuvarima šuma u skladu sa tada važećim Zakonom o šumama ("Službeni glasnik Unsko-sanskog kantona", broj: 22/12, 16/16 i 12/17) i Mišljenjem Agencije za državnu službu Federacije Bosne i Hercegovine da su za to

ispunjeni uvjeti, rješenjem je raskinut radni odnos u Kantonalnoj upravi za šumarstvo sa 30.12.2017. godine radi prelaska u ŠPD "Unsko-sanske šume", pa su ista nakon zadnjih izmjena Zakona o šumama i Zakon o dopuni Zakona o organizaciji i nadležnostima kantonalnih organa uprave i upravnih organizacija morala biti poništena, a sve iz razloga što primopredaja čuvarskih reona nije bila završena.

Ovo Ministarstvo je u skladu sa odredbom člana 91a. Zakona o šumama, kako bi omogućilo provođenje i okončanje primopredaje čuvarskih reona donijelo Pravilnik o izmjenama Pravilnika o načinu žigosanja, obrojčavanja, premjeravanja, sadržaju i načinu izdavanja otpremnog iskaza za drvo ("Službeni glasnik Unsko-sanskog kantona", broj: 20/17 i 6/18). Izmjena se odnosila na rok u kojem će pečati šumskih čekića i otpremni iskazi koji nisu u skladu sa odredbama dostadašnjeg Pravilnika ostati u upotrebi najkasnije do 30.06.2018. godine.

Obzirom na službenu prepisku sa ŠPD-om "Unsko-sanske šume" i Kantonalnom upravom za šumarstvo i niz sastanaka koji su održani u vezi sa aktivnostima koje se poduzimaju u provođenju člana 91.a Zakona o šumama, došlo se do zaključka da primopredaja neće biti okončana u propisanom roku, zbog čega je ministar ovog Ministarstva još jednom produljio rok iz Pravilnika o načinu žigosanja, obrojčavanja, premjeravanja, sadržaju i načinu izdavanja otpremnog iskaza za drvo ("Službeni glasnik Unsko-sanskog kantona", broj: 6/18) te dana 25.07.2018. godine donio novi Pravilnik o dopuni Pravilnika o načinu žigosanja, obrojčavanja, premjeravanja, sadržaju i načinu izdavanja otpremnog iskaza za drvo (čija objava će po informaciji Ureda Vlade biti u Službenom glasniku koji je u pripremi) kojim je propisao da izuzetno, ukoliko se prilikom primopredaje čuvarskih reona ukaže opravdana potreba, rok iz stava (2) ovog Pravilnika produžava se najviše dodatnih 60 dana. Međutim, kako primopredaja čuvarskih reona nije okončana ni u ovom dodatnom roku, ŠPD "Unsko-sanske šume" je ovom Ministarstvu predložilo da uputi inicijativu za izmjenu Zakona o šumama u dijelu da se produži rok za primopredaju čuvarskih reona za još dva mjeseca, kao i da zbog značajnih dodatnih troškova koji će nastati prelaskom čuvara šuma pokrene postupak izmjena I dopuna Zakona o šumama u dijelu koji se odnosi na plaćanje naknade za korištenje državnih šuma u cilju smanjivanja iznosa naknade i time stvorila pretpostavka za osiguravanje sredstava za finansiranje čuvarske službe.

S druge strane, Kantonalna uprava za šumarstvo je na osnovu saglasnosti koju je ovo Ministarstvo dalo na predložene kriterije na osnovu kojih će zadržati dio uposlenika za rad u privatnim šumama, provelo postupak rangiranja namještenika – viših referenata čuvara šuma i u skladu sa članom 91a. Zakona o šumama i Mišljenjem Agencije za državnu službu F BiH o ispunjenosti uvjeta iz Zakona o državnoj službi Unsko-sanskog kantona, donio rješenja o prestanku radnog odnosa sa danom 30.06.2018. godine za 29 namještenika koji u skladu sa utvrđenom Rang listom neće biti raspoređeni na rad u privatnim šumama. Namještenici kojima je rješenjem raskinut radni odnos su sa danom 29.06.2018. godine razdužili šumske čekiće u Kantonalnoj upravi. Isti su od strane Ureda za zajedničke poslove Vlade Unsko-sanskog kantona objavljeni iz državne službe.

Iako je direktor Kantonalne uprave za šumarstvo odmah po donošenju rješenja o raskidu radnog odnosa ista dostavio ŠPD "Unsko-sanske šume" radi preuzimanja i zasnivanja radnog odnosa bez javnog poziva, a u skladu sa stručnom spremom i radnim iskustvom, ŠPD "Unsko-sanske

šume" je Kantonalnoj upravi za šumarstvo dostavilo akt, broj: 01-1844-30/18 od 29.06.2018. godine kojim obavještava njenog direktora da ovim uposlenicima nije u mogućnosti ponuditi ugovore o radu navodeći da to nije moguće iz razloga što je rješenja o raskidu radnog odnosa zaprimilo zadnji dan u mjesecu (29.06.2018. godine) a da rok iz člana 91a Zakona o šumama ističe sutradan 30.06.2018. godine, te iz razloga što ista nisu pravosnažna i izvršna jer član 53. Zakona o državnoj službi Unsko-sanskog kantona ("Službeni glasnik Unsko-sanskog kantona", broj: 14/17 i 16/17) propisuje da žalba protiv rješenja odlaže izvršenje istih. Slijedom istog, Ured za zajedničke poslove Vlade Unsko-sanskog kantona je zatražio poništenje odjava za čuvare šuma kod Poreske uprave, tako da su isti i dalje prijavljeni.

Napominjemo da tada niti jedan čuvar šuma još uvijek nije uložio žalbu na doneseno rješenje o raskidu radnog odnosa i da su počeli podnositi zahtjeve za prijem u radni odnos u Upravi ŠPD-a u Bosanskoj Krupi. Obzirom da ovim namještenicima od strane ŠPD "Unsko-sanske šume" nije ponuđen ugovor o radu u skladu sa članom 91a Zakona o šumama, a u isto vrijeme je tekao rok za podnošenje žalbe, poduzeli su logičan čin koristeći svoje pravo na pravni lijek i izjavili žalbe na rješenje.

Smatrajući da pravosnažnost rješenja o prestanku radnog odnosa uposlenika u državnoj službi ne obavezuje ŠPD "Unsko-sanske šume" d.o.o. Bosanska Krupa u smislu njihovog preuzimanja odnosno provedbe njihove zakonske obaveze ŠPD-a i da nema pravnog razloga koji bi dovodio u pitanje valjanost ugovora o radu koji bi zaključili ovi uposlenici i ŠPD "Unsko-sanske šume" d.o.o. Bosanska Krupa jer bi stupanjem na rad zasnovali novi radni odnos čime bi i izjavljene žalbe izgubile osnov, ovo Ministarstvo ne može prihvatiti ovakva objašnjenja ŠPD-a kao razlog zbog kojeg čuvare šuma nije preuzelo. Radi preciznosti podataka ŠPD je zaključilo ugovor o radu sa dva čuvara šuma Kantonalne uprave za šumarstvo Hrnjica Jasminom i Dizdarević Edhamom za koje su naveli da su učinili jer se ova dva čuvara šuma nisu žalila na rješenja o prestanku radnog odnosa, međutim, ovi navodi nisu tačni, jer su oba čuvara šuma kao i drugi izjavili žalbe na ova rješenja.

ŠPD "Unsko-sanske šume" je aktom, broj: 01-3542-62/16 od 13.06.2018. godine dostavilo informaciju sa podacima o stanju primopredaje čuvarskih reona, iz koje je utvrđeno da je primopredaja u toku, da je u određenom broju reona primopredaja završena, kao i da u nekima nije ni započeta. Prema zadnjoj informaciji ŠPD-a od 05.09.2018. godine na terenu je ostalo za primopredaju još ukupno 30 reona, površine 59.226 ha i to u P.Š: Sanski Most 10 reona površine 13.131,1 ha, Bosanski Petrovac 9 reona površine 18.983,4 ha i P.Š. Bihać 11 reona površine 27.111,5 ha. Od preostalih reona u njih 15 je primopredaja djelimično započeta.

U istom aktu ŠPD navodi da nije moglo utjecati na dinamiku obavljanja predradnji iz nadležnosti ovog Ministarstva i Kantonalne uprave za šumarstvo koje bi obezbijedile blagovremeno provođenje svih poslova primopredaje, kao i da ovo Ministarstvo nije stvorilo pretpostavke da se primopredaja okonča obzirom da nije ponovno produljilo rok iz Pravilnika o načinu žigosanja, obročavanja, premjeravanja, sadržaju i načinu izdavanja otpremnog iskaza za drvo, zahtjevajući od istog da u tom slučaju shodno Zakonu o šumama i pravilima struke izda upute kako navedeno riješiti da bi se postupak primopredaje reona priveo kraju i okončao u cjelosti.

Napominjemo da se ovo Ministarstvo u vezi sa navedenim obratilo Kantonalnoj upravi za inspeksijske poslove i zatražilo inspeksijski nadzor kantonalne inspekcije za rad u dijelu koji se

odnosi na preuzimanje uposlenika i kantonalnog šumarskog inspektora u dijelu koji se odnosi na primopredaju čuvarskih reona iz razloga utvrđivanja stanja pokrivenosti državnih šuma čuvarskom službom i da su se obje inspekcije oglasile nenadležnima za postupanje. Kantonalna inspekcija rada se oglasila nenadležnom iz razloga što se kako je navela ne radi o provedbi zakona o radu, a šumarska inspekcija je dala odgovor da je u njenoj nadležnosti primjena propisa iz oblasti šumarstva, a ne provedba zakonskih propisa?!. Ovakav stav postupajućih inspektora je prema mišljenju ovog Ministarstva iznenađujući i nevjerovatan, obzirom da je i odredbama člana 72. Zakona o šumama ("Službeni glasnik Unsko-sanskog kantona", broj: 22/12, 16/16, 12/17 i 25/17) utvrđena jasna nadležnost šumarske inspekcije.

Kako bi se osigurala zakonitost postupanja i otklonile sve nepravilnosti, od Ministarstva pravosuđa i uprave USK – Upravnog inspektora je još 03.07.2018. godine zatražen inspeksijski nadzor nad postupanjem Kantonalne uprave za šumarstvo vezano za postupak raskida radnog odnosa i nedonošenje Pravilnika o unutrašnjoj organizaciji i sistematizaciji radnih mjesta i raspored državnih službenika. Upravni inspektor nije ovo Ministarstvo obavijestio o svom postupanju po predstavi.

Sve navedeno je dovelo i do problema zakonitosti isplate plata čuvara šuma kojima je raskinut radni odnos. S jedne strane, do konačnosti njihovih rješenja o raskidu radnog odnosa ovi uposlenici imaju pravo na isplatu plate, međutim kako je dana 30.06.2018. godine protekao rok iz Zakona o šumama i Zakona o organizaciji i nadležnostima kantonalnih organa uprave i upravnih organizacija u kojem je Kantonalna uprava za šumarstvo mogla u svojoj nadležnosti imati ove uposlenike, zakonski ovi uposlenici više ne mogu biti uposlenici Kantonalne uprave za šumarstvo. Svako daljnje odugovlačenje preuzimanja čuvara šuma od strane ŠPD "Unsko-sanske šume" d.o.o. Bosanska Krupa kao svoje zakonom propisane obaveze predstavljat će problem za Vladu Unsko-sanskog kantona, Budžet Unsko-sanskog kantona, a posebno kršenje prava uposlenika.

Slijedom iznijetog, ovo Ministarstvo traži od Vlade Unsko-sanskog kantona da nakon razmatranja ove informacije u cilju poduzimanja potrebnih mjera, donese zaključak kojim će obavezati ŠPD "Unsko-sanske šume" d.o.o. Bosanska Krupa i Kantonalnu upravu za šumarstvo da u okviru postojećih propisa okončaju primopredaju čuvarskih reona i preuzimanje u najkraćem roku uposlenika –čuvara šuma od strane ŠPD "Unsko-sanske šume" d.o.o. Bosanska Krupa.


S poštovanjem;

Dostavljeno:

1. Naslovu x5
2. a/a

MINISTAR:
Dragan Polimanac, dipl.pravnik





Na osnovu člana 16. Zakona o Vladi Unsko-sanskog kantona ("Službeni glasnik Unsko-sanskog kantona", broj: 5/08), člana 23. i 24. Poslovnika o radu Vlade Unsko-sanskog kantona ("Službeni glasnik Unsko-sanskog kantona", broj: 26/12, 3/14 i 11/14), a u vezi sa članom 91a. stav (1) Zakona o šumama ("Službeni glasnik Unsko-sanskog kantona", broj: 22/12, 16/16, 12/17 i 25/17), na prijedlog Ministarstva poljoprivrede, vodoprivrede i šumarstva, Vlada Unsko-sanskog kantona, na sjednici održanoj 06.09.2018. godine, donosi :

ZAKLJUČAK

I

Usvaja se Informacija o poduzetim aktivnostima u preuzimanju čuvarske službe iz nadležnosti Kantonalne uprave za šumarstvo u nadležnost ŠPD "Unsko-sanske šume" d.o.o. Bosanska Krupa.

II

Obavezuje se ŠPD "Unsko-sanske šume" d.o.o. Bosanska Krupa, da namještenicima raspoređenim na poslovima viših referenata-čuvara šuma u Kantonalnoj upravi za šumarstvo, u roku od osam dana od dana donošenja ovog Zaključka ponudi zaključenje ugovora o radu na neodređeno vrijeme, bez utvrđivanja perioda probnog rada i iste rasporedi na poslove u ŠPD „Unsko-sanske šume“ d.o.o. Bosanska Krupa, u skladu sa stručnom spremom i radnim iskustvom.

III

Obavezuje se ŠPD "Unsko-sanske šume" d.o.o. Bosanska Krupa i Kantonalna uprava za šumarstvo, da u roku od trideset dana od dana donošenja ovog Zaključka završe poslove primopredaje čuvarskih reona.

IV

Ovaj Zaključak stupa na snagu danom donošenja i objavit će se objaviti u "Službenom glasniku Unsko-sanskog kantona".

Broj: 03-017-2642/2018
Bihać; 06.09.2018. godine





2359
08

Broj 08-26-10071-1/2018
Bihać, 07.09.2018.godine

Na osnovu člana 71. stav (1) i (2) Zakona o šumama („Službeni glasnik Unsko-sanskog kantona“, br.: 22/12, 16/16 i 12/17), a u vezi sa Zaključkom Vlade Unsko-sanskog kantona, broj:03-017-2642/2018, od 06.09.2018. godine, ministar Ministarstva poljoprivrede, vodoprivrede i šumarstva donosi slijedeću

INSTRUKCIJU

I

Nalaže se ŠPD „Unsko-sanske šume“ d.o.o. Bosanska Krupa i Kantonalne uprave za šumarstvo da postupe u skladu sa Zaključkom Vlade Unsko-sanskog kantona, broj:03-017-2642/2018, od 06.09.2018. godine i okončaju poslove primopredaje čuvarskih reona u utvrđenom roku.

II

Nalaže se ŠPD „Unsko-sanske šume“ d.o.o. Bosanska Krupa da u utvrđenom roku postupe u skladu sa tačkom II Zaključka Vlade Unsko-sanskog kantona, broj:03-017-2642/2018, od 06.09.2018. godine.

III

Ukoliko se u toku primopredaje čuvarskih reona zatekne šteta pričinjena bespravnom sječom, potrebno je takvu štetu evidentirati šumarskim čekićem ŠPD „Unsko-sanske šume“ d.o.o. Bosanska Krupa, uz navođenje u zapisnik o primopredaji da je šteta nastala prije primopredaje.

IV

Kako je Pravilnikom o načinu žigosanja, obrojčavanja, premjeravanja, sadržaju i načinu izdavanja otpremnog iskaza za drvo istekao rok za upotrebu šumskih čekića „ŠK“ od strane Kantonalne uprave za šumarstvo, potrebno je da šumske čekiće sa oznakom „ŠK“komisijski unište a sve u skladu sa navedenim Pravilnikom i o tome obavijesti Ministarstvo poljoprivrede, vodoprivrede i šumarstva i Kantonalnu upravu za inspekcijske poslove.

Dostaviti:

1. ŠPD UNSKO-SANSKE ŠUME
Radnička bb
Bosanska Krupa
2. Kantonalna uprava za šumarstvo
Titova bb
Bosanski Petrovac
3. Premijer Kantona (na znanje)
4. Kantonalna uprava za inspekcijske poslove (na znanje)
5. a/a

MINISTAR

Dragan Polimanac, dipl.pravnik

